

«La Quotidiana fa pli ritg mes «da chasa» rumantsch»

25 onns, vers 6500 ediziuns, enturn 100'000 paginas redacziunalas rumantschas, en tschintg idioms ed en rumantsch grischun. Quai èn las cifras da giubileum da la «suletta gasetta dal di inter-rumantscha» La Quotidiana. Dapi ils 6 da schaner 1997 cumpara questa gasetta dal di or da la cuschina da la chasa editura privata Somedia. En il decurs dal davos quart tschientaner ha la gasetta però stui subir er ina u l'otra midada, surtut a nivel da la redacziun. Collavuraturas e collavuraturers èn vegnids transferids pass a pass tar l'Agentura da novitads rumantscha (anr) e pli tard tar la Fundaziun Medias Rumantschas (FMR). Ma surtut ha La Quotidiana era già durant tut quests onns lecturas e lecturs fidaivels e persunas engaschadas ed interessadas en connex cun il svilup da la gasetta. Ina ventgina da quellas persunas lascha la FMR vegnir a pled sin las proximas paginas, per sa regurdar, per gratular, per trair bilantscha e per guardar en il futur. (fmr/dat)



«Quai che n'è betg stà en La Quoti, n'hai betg dà!»

Quai ch'aveva num pli baud en Surselva «sch'igl ei buca stau ella Romontscha, lura hai buca dau ei!» ademplescha dapi in quart tschientaner La Quotidiana – il medium che rapporta da politica, sport, cultura e communitad or da las regiuns rumantschas. Di per di.

Grazia fitg a fundatur ed iniziants, purtadras e purtaders sco era a l'entira squadra da La Quotidiana. Nus basegnain vinavant vossas retschertgas, voss rapports, voss interess e voss plaschair da scriver. Voss engaschi è relevant per las valadas periferas en noss chantun e per la communitad rumantscha.

Anita Capaul,
manadra da la Chasa Editura Rumantscha

In privilegi ed ina sfida

Suenter avair misterlà ed esser stà cunresponsabel per l'emprima gasetta rumantscha dal di durant l'emprim quart tschientaner èsi pli prudent da laschar far bilantscha auters. Per la redacziun èsi en tutta cas stà in privilegi, dentant er in ristg d'instradar e cunzunt er ina gronda sfida da mantegnair quest product innovativ per la Rumantschia. Quai tant pli ch'ins ha dà a La Quotidiana pitschnas schanzas da surviver e che sia existenza è stada periclitada repetidamain. Che la La Quotidiana exista anc oz e cuntinuescha cun schlantsch, quai

ha duvrà bler engaschament e perseveranza ed è il merit da blers, ina veritabla lavur

cumina. Grond plaschair hai jau dal svilup actual da

La Quotidiana, da sias innovaziuns graficas e digitalas e dal cuntegn. Quitads ma fa la digren d'abunents e la pitschna acceptanza da La Quotidiana ordaifer la Surselva. Era sche betg tut è grategià, la via da l'avischinaziun inter-rumantscha è e resta gista. Perquai in viva sin ils proxims 25 onns La Quotidiana!

Martin Cabalzar,
anterior schefredactor La Quotidiana



LQ

Per mai nun è tar LQ [1] betg LQ [2] l'important, mabain LQ [3]. E quella è s'augmentada ils ultims onns.

- [1] LA QUOTIDIANA
- [2] LA QUANTITAD
- [3] LA QUALITAD

Flurin Caviezel,
cabarettist e musicist



Tadlar l'autra vart

«Uschè spert che nus smettain da tadlar auters mainis, n'emprendain nus era nagut pli. Pertge che s'entupar adina cun il medem, cun il monoton, n'avra strusch l'orizont. Il carstgaun emprenda surtut da las differenzas...» – Quai scriva l'autura tirca-londinaiisa *Elif Shafak* en ses cudeschet essayistic actual «Hört einander zu!»

La Quotidiana porscha la pussaivladad da tadlar, respectivmain da leger auters mainis, mainis che derivan da las autras vals, tuns che derivan dad auters clutgers. En quest senn fa ella part da la visiun rumantscha, gea, da l'utopia rumantscha. Ed utopias duvrain nus, sche nus vulain surviver.

Benedetto Vigne,
atur e musicist



Sco in matg mischedau da fluras

Denter las pli stentusas, nunfritgeivlas e frustrontas fatschentas da miu temps sco secretari dalla Ligia Romontscha dils onns 1978 entochen 1980 ein las sesidas stadas che jeu hai giu d'organisar cun ils editurs romontschs ed ils representants dallas societads affiliadas. Il scopo era d'unificar la pressa romontscha grischuna e cheutras promover l'avischinaziun denter ils idioms. Mo ina tala accumulaziun da tgaus virils, dirs, nummovibels, loschs e perschuidi da sesez ei mai stada radunada en Casa Romontscha sco da quellas uras e per quella fatschenta. Quasi tuts senza la minima intenziun ni inclinaziun d'anflar in resultat ed ina nova via. Gnanc ina jota concessiuns vulevan quels sturnichels dalla professiun editoria far in cun l'auter.

Ei ha duvrà la profunda crisa economica dallas stamparias regionalas grischunas per che ils mistrals e possessurs dalla pressa romontscha daventien (silmeins per part) raschuneivels. Senza *Hanspeter Lebrument* da Cuera fussen ils editurs romontschs cun lur crestastgiet inflamada mai arrivai ad ina convegna vicendeivla per la promoziun dalla schurnalistica quotidiana e la cultura scretta romontscha. In cass evident, che minoritads drovan mintgatun stauschs e sustegns d'anovians per igl agen beinstar.

Oz ei La Quotidiana in dils pli ferm pilasters per la preschientscha dil romontsch scret, enteifer ed ordeifer il territori. Mintga ediziun ha per mei igl avantag e porscha il deletg da haver avon mes egl la grondiura rihazia da quei pign lungatg regional che sepresenta cheu en sia diversitad sco in matg mischedau da fluras las pli diversas. E tuttina parentadas en lur provenientscha, sonoritad (nies tschurvi auda il lungatg gie era cu nus mo legin quel tut da bass) e lur harmonia zuppada. La Quotidiana sto restar per nus Romontschs in «sine qua non». Ni per dir ei en in lungatg pli direct: Nus vivin era el futur meglier cun La Quotidiana che senza ella!

Curascha e buns giavischs a tuttas tgiradras e tgiraders dalla schurnalistica romontscha per ils 25 onns vegnents.

Iso Camartin,
publicist ed anterior secretari general dalla Lia Rumantscha

